

Uunga siunnersuut: Unammilleqatigiinneq pillugu Inatsisartut inatsisaata aamma nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut peqqussutaata allanngortinneqarnerinik Inatsisartut inatsisaat nr. xx, ulloq xx. xxxx 2017-imeersoq. (Suliassaqarfinni aalajangersimasuni unammilleqatigiinnermik aqutsineq, attaveqaqatigiissutit elektroniskiusut nunanillu tamalaanik suleqateqarneq)

Inuussutissarsiornermut, Suliffeqarnermut, Niuernermit Nukissiuuteqarnermullu Naalakkersuisumit saqqummiunneqartoq

pillugu

Sanaartornermut Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap ulloq 18. oktober 2017-imi suliarinninnermini ilaasortarai:

Inatsisartunut ilaasortaq Bendt B. Kristiansen, Inuit Ataqtigiit, siulittaasoq
Inatsisartunut ilaasortaq Jens-Erik Kirkegaard, Siumut, siulittaasup tullia
Inatsisartunut ilaasortaq Pitsi Høegh, Siumut
Inatsisartunut ilaasortaq Jess Svane, Siumut
Inatsisartunut ilaasortaq Villy Olsvig, Inuit Ataqtigiit

UKA 2017-ip nalaani ulloq 4. oktober 2017-imi siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Nalunaarasuartaateqarnermi ammasumik paasiuminartumillu unammilleqatigiinnissap maleruagassiornissaa kiisalu internetimut appakaaffissaqartitsineq aamma peqatigiilluni ataatsimut atuisitsisinnaatitsineq pillugit oqartussat sullissinerata eqaannerulersinneqarnissaa siunnersuuteqarnermi siunertaavoq.

2. Siunnersuutip Inatsisartunit siullermeerneqarnera

Siunnersuut ilassilluarneqarpoq nalinginnaasumillu taparserneqarluni.

3. **Tusarniaanermut akissutit**

Tusarniaanermut akissutit inatsisissatut siunnersuummut ilanngunneqarsimapput, tamannalu Inatsisartut Siulittaasoqarfiata ilusiliinissamut piumasaqaataanut naapertuuppoq.

Ataatsimiititaliap paasivaa siunnersuut sukumiisumik tusarniaassutigineqarsimasoq aammalu siusissukkut susassaqtartunut ukununnga tusarniaassutitut nassiunneqarsimasoq: TELE-POST, Inui:IT A/S, GVT, Nuuk TV aamma Sulisitsisut. Kiisalu susassaqtartunik tusarniaanermut atatillugu susassaqtartut pingaarnerit siunnersuut pillugu ataatsimeeqatigineqarsimapput. Tassani peqataapput TELE-POST, Inui:IT A/S, GVT, Nuuk TV aamma Sulisitsisut.

Kiisalu siunnersuut Namminersorlutik Oqartussat tusarniaanermut nittartagaatigut tamanut tusarniaassutigineqarsimavoq aammalu ukununnga tusarniaassutitut nassiunneqarsimalluni: Naalakkersuisoqarfiit tamarmik, Kommuneqarfik Sermersooq, Kommune Kujalleq, Qeqqata Kommunia, Qaasuitsup kommunia, KANUKOKA, Sulisitsisut, Nuuk TV, GTV, Comby A/S, Inui:it A/S, TELE-POST.

4. **Inatsisissamik nassuiaaneq**

Ataatsimiititaliap siunnersuummik suliarinninnerani atugassatut nalunaarasuartaatitigut atassuteqarneq nalunaarasuartaatitigullu kiffartuussinerit pillugit inatsisissatut siunnersuut, UKA 2017/109, siunnersuummut matumunnga tunngatillugu inatsimmik oqartussaaffimmillu tunniussisuusoq, nassuiaatigeqqullugu Attaveqarnermut il.il. Naalakkersuisoq qinnuigineqarpoq.

Taamaalillunilu inatsisissamik nassuiaaneq ulloq 16. oktober ingerlanneqarpoq, tamatumanilu apeqquteqarnissamut aammalu attaveqarnermut suliassaqarfimmi nalinginnaasumik inatsiseqarneq pillugu oqaaseqaateqarnissamut ataatsimiititaliaq periarfissaqarluni.

Partiit ataatsimiititaliami sinniisoqanngitsut attaviitsorlu inatsisissamik nassuiaanermut aamma aggersarneqarput.

5. **Ataatsimiititaliap siunnersuummik suliarinninnera**

Ataatsimiititaliap siunnersuut misissorpaa oqaatigissallugulu nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisissaattut siunnersuutitp (UKA 2017/109) nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut peqqussutaat 2006-imeersoq taarseraa aammalu suliassaqarfiit marluk unammilleqatigiinneq pillugu inatsimmut nuukkai.

Suliassaqarfiit taakku marluk siunnersuummi matumani sammineqarput.

Tamatumani peqatigiilluni ataatsimut atuisitsisinnaatitsinermut maleruagassat aammalu peqatigiilluni ataatsimut atuisitsisinnaatitsinermik nakkutilliinerup taamatullu naatsorsuutitut tunngasumik nakkutilliinerup unammilleqatigiinneq pillugu inatsimmut nuunneqarnerat pineqarmat ataatsimiititaliamit maluginiarneqarpoq.

Siunnersuut inatsisilerinikkut sukumiisumik suliarineqarsimasoq, tamatumanilu susassaqtut pingaarnert inatsisilerinermi siusissorujussuakkut akuliutinneqarsimasut ataatsimiititaliamit maluginiarneqarpoq. Taama suleriaaseqarneq ataatsimiititaliamit nersorumaneqarpoq kaammattuutigineqarporlu inatsisissanut allanut tunngatillugu atorneqartassasoq.

Ilusiliinermut tunngasumik apeqqutit taakkunungalu akissutit tunngavigalugit matumani suliarineqartumut annertunerusumik iliuseqarnissamut ataatsimiititaliaq tunngavissaqanngilaq.

6. Siunnersuutip aningaasaqarnikkut kingunerisassai

Siunnersuutip piviusunnngortinneqarnerani aningaasaqarnikkut kingunerisassat siunnersuummut nalinginnaasumik nassuiaatini allaaserineqarput.

Tassani allassimavoq siunnersuummik atuutsitsilerneq Atuisartoqarnermut Unammilleqatigiinnermullu Aqutsisoqarfimmut aningaasartuutaassasoq. Suliaqarfik nutaaq Atuisartoqarnermut Unammilleqatigiinnermullu Aqutsisoqarfimmi inatsisilerituup ukiumut suliarisinnaasaanik pisariaqartitsissasoq naatsorsuutigineqarpoq.


Tamatuma peqatigisaanik nalunaarasuartaaserinermik suliallit unammilleqatigiinnikkut pitsaannerusunik maleruagassaqalernerat, taamaalillunilu sulianik ingerlatsisarnerup pitsaanerulernissaa maleruagassat nutaat qulakkeerpaa.

Maleruagassanik atuutsitsilernerme aningaasartuutit kontomi pingaarnermi 62.30.01-imi Atuisartoqarnermut Unammilleqatigiinnermullu Aqutsisoqarfimmut aningaasaliissutaasut iluini akilerneqassapput.

7. Ataatsimiititaliap inassuteqaatai

Taama iluseqartillugu siunnersuut akuerineqassasoq Sanaartornermut Ataatsimiititaliap isumaqatigiittup inassutigaa.


Taama oqaaseqarluni isumaliutissiissummilu allassimasutut oqaaseqaateqarluni ataatsimiititaliap siunnersuut aappassaaniigassanngortippaa.



Bendt B. Kristiansen,
Siulittaasoq



Jens-Erik Kirkegaard,
Siulittaasup tullia



Jess Svane



Pitsi Høegh



Villy Olsvig